

hujusmodi motus excitare, vel negantem concursum suum ad eosdem, et hic modus sine dubio fuit possibilis, et posset merito dici ligatio fomitis. Tertio modo potest intelligi hic effectus fieri, partim per habitus et virtutes perfectas, partim per divinam gratiam existantem, prævenientem et adjuvantem. Et hic modus possibilis est, et ex suo genere in homine puro viatore maxime perfectus. Quia includit gratiam et heroicas virtutes, et divinum auxilium necessarium. Nam, quia homo non videns Deum, neque ipsum semper actualiter amat, nec per rationem superiorem de omnibus agendis semper considerat, nec potest per se omnes occasiones prævenire, ne appetitus excitetur prius quam ratio vigilet, ideo necessarium est hoc divinum auxilium quod hominem custodiatur. Et hic modus, si perfectas virtutes includat, merito dici potest extinctio fomitis, cum per illum, et appetitus inferior intrinsece perficiatur, et subordinetur superiori, et ipsa superior ratio ex divino auxilio semper, cum oportet, attendat et præveniat, ne ab inferiori præveniatur.

9. *A primo sanctificationis instanti in Virgine, peccati fomes extintus.* — Ex his igitur facile est de supra dictis sententiis judicium ferre. Simpliciter enim dicendum censeo in B. Virginie a prima sanctificatione fomitem extinctum fuisse, quamvis hic effectus in secunda sanctificatione auctus fuerit et perfectus. Probatur, quia imprimis dici non potest in Virgine solum fuisse impeditos hujusmodi motus per solam extrinsecam providentiam, ut ea ratione dicatur tantum fuisse ligatus, tum quia ille modus est valde imperfectus, et ideo non est cur Virgini tribuatur; præsentim cum non sit consentaneus ordinario modo providentiae Dei, qui causis secundis principia tribuit intrinseca ad hujusmodi effectus, et ipse solum supplet ea quæ per intrinseca principia fieri a causis secundis convenienter non possunt; tum etiam quia B. Virgo a principio habuit gratiam et virtutes omnes per se, et per accidens infusas valde perfectas, quibus conjunctum est illud divinum auxilium.

10. *Objectio.* — *Responsio.* — Quod si forte dicitur non fuisse illi a principio datas virtutes in gradu adeo perfecto, ut ad extinguendum fomitem censeri possit sufficiens, vel saltem non esse illi datum quamdam aliam qualitatem, quæ intrinsece ac proprie perficit hunc effectum, respondetur primum: hoc, quod dicitur de quadam alia qualitate, commentium est, et intelligi certe non potest, ut ex

supra dictis constat, et ex iis quæ supra de extincto fomite in Christo, et alibi de justitia originali Adæ dicta sunt. Deinde, sive per hujusmodi qualitatem, sive per virtutes infusas in gradu perfecto, vel solas, vel (quod verius est) conjunctas divinæ custodiæ dicatur extinguui fomes, sine causa negatur datum fuisse Virgini in prima sanctificatione perfectæ virtutis gradum ad hunc effectum necessarium. Quia Adæ et Evæ in prima sanctificatione datae sunt gratia et virtutes in gradu heroico ad hunc effectum sufficiente; sed copiosior gratia, et perfectiores virtutes datae sunt Virginie in prima sua sanctificatione, ut ex principiis supra positis constat. Unde Bernard., Epist. 174: *Ego, inquit, puto, quod copiosior sanctificationis benedictio in eam descendit, quæ ipsius non solum sanctificaverit ortum, sed et vitam ab omni peccato deinceps custodierit immunem;* ubi loquitur de intrinseca perfectione gratiæ sanctificantis; quæ (ut supra dicebamus) non posset sufficienti modo disponere ad superandum perfecte omne peccatum, nisi esset etiam sufficiens in suo genere ad fomitem extinguendum. Et confirmatur tum ratione facta pro secunda sententia; tum etiam alia ratione supra indicata, quia Deus, qui suaviter omnia disponit, tribuit causis secundis virtutes intrinsecas effectibus accommodatas; tum denique quia B. Virgo ante conceptionem filii dicta est *plena gratia*, quam plenitudinem proportionaliter habuit a prima sanctificatione; includit autem hæc plenitudo omnem effectum decentem eam quæ futura erat mater Dei; tota autem hæc perfectio illam maxime decet, ut ostensum est.

41. *Responsio ad argumenta in oppositum.* — Neque in contrarium obstat fundamentum primæ sententiae; nihil enim Christi dignitati derogat, quod hanc perfectionem matris communicaverit inferiori modo, quam in ipso fuit; ipse enim per se habuit omnem et animæ et corporis sanctitatem, Virgo autem per ipsum; ille ut Deus homo habuit in sua voluntate humana perfectum dominium in omnes actiones suas, et in omnia objecta quæ illas poterant excitare, et ut beatus semper actu considerabat omnia, unde etiam per intrinsecam providentiam et virtutem omnia poterat prævenire; B. autem Virgo pro statu viæ non fuit tantæ perfectionis capax. Sicut autem non derogat sanctitati animæ Christi, quod antequam illa extiterit, ex merito ejus multæ animæ fuerint sanctificate, etiam in

gradu valde perfecto et eximio, ita non derogat puritati et sanctitati carnis Christi, quod ante formationem ejus caro matris fuerit perfecte sanctificata usque ad extinctionem fomitis, sed hoc potius commendat providentiam, charitatem, et efficaciam meriti ipsius. Nec est simile de perfectione gloriæ: illa enim est perfectio pertinens ad terminum, in quo nullus hominum constitui debuit, nec in anima, nec in corpore, ante Christum; haec autem est perfectio accommodata et communicabilis viatori.

42. *Responsio ad testimonia Patrum.* — Ad Patres respondetur potius a nobis stare. Cyprianus enim non de fomite peccati, sed de sensibili voluptate loquitur, quam B. Virgo in conceptione filii, Spiritu Sancto obumbrante, non sensit. Et similiter Arnobius non tractat de fomite, sed de æstu libidinis et sordibus puerperii, et has vocat carnales maculas, a quibus B. Virgo in conceptione et partu preservata fuit. Et idem fere est sensus Cyril., Nazianz., et aliorum, docentium Virginem in conceptione filii ab omni carnis immunditia et indecentia fuisse immunem. Addi etiam potest ex D. Thom. hic, art. 3, ad 3, Virginem in filii conceptione ampliori sanctificatione fuisse donatam, cum majori mentis illuminatione, et totius animæ ad Deum collectione. Et haec solet a Sanctis vocari *purgatio*, non a culpa, sed ab externis impedimentis, a remissione animi, ab ignorantia negativa, seu nescientia, ut Dion. loquitur, c. 6 de Cœl. hierar., p. 3, post medium.

SECTIO VI.

Utrum B. Virgo in prima sanctificatione originalem justitiam accepit?

1. *Ratio dubitandi oritur ex præcedenti dubio, quia, scilicet, extinctio fomitis est effectus formalis originalis justitiae.* Difficultatem hanc tractat late Cordub., lib. 4 sui Quæstionar., q. 46, ubi refert quosdam auctores simpliciter asserentes, B. Virginem habuisse originalem justitiam. Quod etiam sentit Carthus., lib. de Praeconio et dignitate Mariæ; et Canisius, lib. 1 de Deipara, c. 9, referens Cardinalem Cusanum, lib. 8 suorum operum, circa illud: *Sicut lilyum inter spinas.* Indicat etiam Durand., in 3, d. 3, q. 3; et Cajet., 4. 2, q. 109, art. 2, dum inquit in B. Virginie fuisse *donum integratæ naturæ*, quod sola ratione a justitia originali distinguit; et favet Ansel., lib. de Conceptu Virg., c. 20, ubi de

Christo loquens ait, a sua origine justitiam originalem habuisse. Quod non potuit alia ratione dicere, nisi quia fomite caruit; ergo idem, proportione servata, dicendum est de Virgine, cum etiam fomite caruerit, ut, sicut justitia originalis, quæ communicata est Adæ ut primo naturæ principio, communicata fuit Eve, quæ in adjutorium simile sibi data est, ita suo modo Christo et B. Virgini sit data.

2. *Justitia originalis quid sit.* — Ad explicandam exacte hanc difficultatem, oportet diligenter inquirere quid justitia originalis sit, quos effectus habeat, et quomodo; sed quoniam hoc est a præsenti instituto alienum, suppono justitiam originalem fuisse quoddam donum sanans naturam constituendo perfectum ordinem inter Deum et hominem, et inter partes seu appetitus hominis inter se, ita ut inferiora superioribus, et omnia Deo essent perfecte subjecta. Hoc autem donum (ut opinor) nihil intrinsecum erat in homine, præter gratiam in essentia animæ existentem, et virtutes omnes per se et per accidens infusas in gradu heroico, quibus adjungebatur specialis Dei providentia et custodia, ut latius in 1 p. q. 95, ostendi.

3. *Ex quo colligitur primo, fuisse in Virgine potissimos effectus originalis justitiae, non tamen omnes, qui ad statum innocentiae seu originalis justitiae pertinebant.*

4. *Primum constat, quia habuit superiori rationem seu portionem perfectissime subjectam Deo, et inferiorem rationem et appetitum superiori, absque ulla discordia, ut ostensum est. Et ideo recte dicitur habuisse integritatem naturæ in ordine ad humanas operationes. Secundum etiam est evidens, quia fuit capax tristitiae, timoris, et similium affectionum, quæ in statu originalis justitiae non erant. Et similiter habuit corpus passibile, quod defatigabatur, et morti fuit subjectum, a quibus omnibus præservabatur homo in illo statu.*

5. *Donum originalis justitiae quomodo fuit in Virgine.* — Secundo hinc concluditur, si justitia originalis sumatur pro collectione omnium horum effectuum, seu pro dono quod omnium illorum principium sit, in B. Virginie non fuisse originalem justitiam, quia non habuit totam collectionem effectuum, nec principium ejus. Nihilominus tamen verissime dici potest habuisse donum originalis justitiae, quoad præcipuos et quasi formales effectus ejus; constat enim hos effectus, qui consistunt in subjectione ad Deum et rationem su-

periorem, et perfecta subordinatione potentiarum, esse præcipios; constat etiam illud donum, quo hi effectus fiebant in Virgine, fuisse ejusdem rationis cum dono collato Adæ ad similes effectus præstandos. Quia (ut dictum est) non fuit aliud præter gratiam, et virtutes perfectas sub divina providentia et custodia; et hoc sensu multi Doctores, in 2, d. 29 et 30, dicunt, fomitem non excludi nisi per originalem justitiam. Et eodem modo possumus loqui de Virginē (quidquid Corduba supra contendat), quanquam, quia B. Virgo non habuit hoc donum ex vi suæ originis, neque cum omnibus effectibus originalis justitiae (ut dictum est), ideo magis expedite non simpliciter ita loqui, sed cum limitatione et declaratione sufficienti, quæ ex dictis facile constat,

ECTIO VII.

Utrum B. Virgo habuerit usum rationis a suæ Conceptionis et sanctificationis initio.

1. Hactenus explicuimus quanta fuerit perfectio multitudine donorum gratiæ sanctificantis, quæ in prima sanctificatione B. Virginis sunt data; de aliis vero donis seu gratis gratis datis, quia non in prima sanctificatione, sed posterius datas esse censemus, inferius suo loco dicendum est. Solum igitur superest explicandum id, quod ultimo loco supra proposuimus, quo modo scilicet B. Virgo fuerit sanctificata, utrum sine propria dispositione (ut ordinarie infantibus contingit), an vero altiori modo, et per propriam dispositionem, more adultorum. Hujus autem decisio pendet ex questione quam in hac sectione præmittimus. In qua indicantur multa. Primum, an in primo instanti habuerit usum rationis, et actum ejus, cum perfecta cognitione et judicio. Secundum, quid per illum actum cognoverit, aut cognoscere potuerit. Tertium, qualis fuerit illa cognitio. Quartum, an hic usus rationis, vel facultas illa utendi, perseveraverit in Virgine tota infantiae ætate.

2. *Virgo ab instante conceptionis actualem rationis usum habuit.* — *Joannes Baptista usum rationis in utero matris habuit.* — Dico ergo primo: Virgo habuit actualem usum rationis in primo instanti conceptionis et sanctificationis suæ. Ita docet expresse Bernardinus Senensis, serm. 51 de B. Virginie, c. 2, art. 1; et Cajet. hic, art. 3; et Viguer., in Institut., c. 5, § 3, vers. 9. Probatur autem ex principio supra posito, quia privilegium gratiæ, alicui puro

homini concessum, non est verisimile B. Virginis fuisse negatum; sed uti ratione tempore suæ sanctificationis datum est Joanni Baptiste, ut patet ex illo verbo Luc. 1: *Exultavit infans præ gaudio in utero meo;* ubi adverte oportet, verbum *exultandi*, interdum analogice seu metaphorice sumi in Scriptura, et tribui rebus etiam inanimatis, juxta illud Psalm. 113: *Montes exultaverunt ut arietes.* Propter quod Jansen., cap. 4 Concord., censet hanc exultationem Joannis non fuisse cum cognitione, nec ibi gaudium significare proprium gaudii affectum, sed motum aliquem externum, seu gesticulationem quæ gaudii effectus esse solet. Nam vox Graeca γαλλιστος, hoc proprie significat. Sed non est cur, ubi proprietas verborum stare potest, ad metaphoras confugamus; certum est autem vocem *exultationis et gaudii*, proprie significare actum vitæ, qui cognitionem supponit, quam propriam significationem etiam vox græca commodius admittit, et juxta illam, perfectior magisque accommodatus sensus redditur. Praesertim quia (ut notavit Origen., homil. 7 in Lucam), licet verbum *exultandi*, simpliciter dictum, metaphorice interdum in Scriptura sumatur, tamen *exultare in gaudio*, nunquam invenietur secundum metaphoram dictum. Quo factum est ut fere omnes Patres, tam Græci quam Latini, in hac expositione consentiant. Ambros., lib. 1 in Luc.: *Habebat intelligendi sensum, qui exultandi habebat affectum.* Idem de Institut. Virg., c. 13, lib. 2 de Virginib., in princip., et lib. 4 de Fide ad Gratian., c. 4; Leo Pap., serm. 10 de Nativit.: *Precursor, inquit, Christi spiritum prophetæ intra viscera matris accipit, et nondum genitus, genitrici Domini signa exultationis ostendit;* clarius Hieronymus, Ep. 7 ad Lætam: *Audiebat* (inquit de Joanne) *verba Domini per os Virginis personantis*, et Bed., Luc. 1: *Prior, inquit, Elizabeth vocem audirebat, sed Joannes prius gratiam sensit, illa Mariæ, iste Domini sensit adventum.* Idem Petr. Chrysolog., serm. 88; August., lib. 2 de Consens. Evang., c. 15, et (si illius sunt opera) in orat. de quinque hæresib., c. 14, et lib. 3 de Mirabilib. sacræ Scripturæ, c. 1; Origenes, hom. 4 in Lucam, dicit Joannem in utero cognovisse Christum, quem Judæi post multa facta miracula ignorarunt. Idem docet hom. 7, et hom. 2 ex variis, in hunc sensum exponens illud verbum Joannis Baptiste, quod Joan. 1 habetur: *Qui post me venit, ante me, id est, ante conspectum meum factus est;* unde

sic inquit: *Qui ordine temporum post nativitatem meam factus est in carne, ante conspectum meum, dum adhuc essem in visceribus matris, propheticō spiritu ridi illum coram me conceptum in utero Virginis.* Idem sentit Chrys., hom. 1 in Lucam; et Theophylact., Luc. 1, qui ita exponit, Joannem Baptistam fuisse plus quam Prophetam, quia ex utero matris habuit propheticam cognitionem; in eadem sententia est Cyril. Hierosol., catech. 3; et Nicephor., lib. 1 Histor., c. 8; et Simeon Metaphrast., orat. de Vita, et dormitione Deiparæ, apud Surium, tom. 5. Ac denique in Concil. Basil., sess. 43, dicitur, Joannem in utero matris Christum cognovisse. Unde Ecclesia in ejus officio canit: *Senserat regem thalamo manentem.* Solus Augustinus, Ep. 57 ad Dardan. (quem D. Thomas hic, a. 6, imitatur), videtur hoc in dubium revocasse. Sed Augustinus eo loco non tantum de usu rationis, sed de tota Joannis Baptiste sanctificatione questionem movet, et nihil ibi negat, sed inquirendo procedit; D. autem Thom. a Cajet. exponit non assertive, sed adversative fuisse locutus, scilicet, quamvis Joannes Baptista non habuisset usum rationis in utero matris, non propterea esse negandum fuisse sanctificatum.

3. Mirum est autem non defuisse, qui cum admirarent hoc privilegium Joanni fuisse concessum, nihilominus negaverint datum Virginis, quia hæc non est perfectio ad maiorem sanctitatem pertinens, sicut breviori aut longiori vita vivere. Hæc autem sententia improbabili mihi videtur. Quanquam enim rationis usus absolute sumptus non necessario pertineat ad maiorem sanctitatem, tamen si ille usus sit per actum fidei, seu cognitionis divinæ, et sit fundamentum sanctificationis et meriti, multum ad perfectionem gratiæ et sanctificationis pertinet. Deinde, licet diutius in via seu mortali vita durare, per se ad perfectionem non pertineat (praesertim si post illam finitam, ad statum et terminum beatitudinis a Deo præfixum statim transeundum sit), quamdiu tamen in hac vita vivimus, frequentius et diuturnius in Dei contemplatione et actuali amore versari, sine dubio est magna perfectio sanctificantis gratiæ; sicut in beatis summa quædam perfectio est, nunquam hujusmodi actus interrupere; nam quo magis in via illis similes efficiuntur, eo magis ad perfectionem accedimus.

4. Dico secundo: hæc rationalis cognitio, quam B. Virgo in eo momento habuit, potis-

simum circa Deum et Christum Dominum vasa est. Hoc fere non indiget probatione. Patet enim tum ex adducto exemplo de Joanne Baptista, qui Christum in utero matris cognovit; tum etiam quia hæc cognitio est ad sanctificationem pertinens; alia vero non erat eo tempore necessaria.

5. Dico tertio: hæc cognitio fuit per actum perfectum fidei. Hæc conclusio non est certa, quia potuit Deus dare B. Virginis in eo instanti scientiam aliquam infusam supernaturalem mysteriorum, et non est improbabile hoc fecisse, de quo infra disputabimus, cum de scientia Virginis ex professo agemus; est autem certum, et consequens ad ea quædicta sunt, cognitionem, quam tunc Virgo habuit, fuisse supernaturalem, et verisimilius est fuisse fidem, quam constat habuisse Virginem aliquando, juxta illud: *Beata quæ credidisti,* hæc enim est sufficiens et accommodata via tori, et ad perfectionem sanctificationis illa sola est necessaria. Quam vero expressa et distincta fuerit hæc fides Virginis, et quæ mysteria per illam cognoverit, in prædicta disputatione commodius tractabimus.

6. *Objectio. — Responsio. — Objectio. — Responsio.* — Dices: Joannis cognitio vocatur prophætica a citatis Patribus, quæ tamen videtur perfectior quam cognitio fidei. Respondet non semper esse perfectiore, neque aliam in substantia a cognitione fidei, ut latius in 2. 2 tractatur. Dices rursus: cum fidei cognitione a sensibus pendeat, quomodo potuit B. Virgo habere actum fidei, antequam posset phantasmatis uti? Respondet non posset Deum, vel ita elevare intellectum Virginis, ut sine dependentia a sensibus per lumen fidei et species alias per se infusas operaretur, sicut in perfecto quodam gradu prophætæ interdum fit, vel etiam posset interior sensum seu phantasiam ita conformatre, ut intellectui cooperari valeret.

7. *Facultas utendi ratione, data Virginis in Conceptione, qualis.* — Dico quarto: probabile est facultatem utendi ratione, datam Virginis in primo instanti, in ea semper durasse. Hæc conclusio est contra Cajet. hic, art. 4, qui ita interpretatur D. Thomam, dicentem esse speciale privilegium Christi habere usum liberi arbitrii in utero matris, intelligendum enim dicit de usu rationis permanente. Conclusiōnem tamen positam tenet Bernardinus Senensis, citato loco, qui argumentum sumit a Joanne Baptista, de quo idem sentit Jacobus Christopolitanus, super Canticum Magnificat,

et potest fieri verisimile. Primo ex illo principio, quod ita videntur Sancti de Joanne Baptista sentire; multo ergo magis est nobis ita de Virgi e sentiendum. Antecedens patet ex Ambrosio, lib. 2 in Luc., c. de Mora Mariæ cum Elizabeth, ubi dicit Joannem crevisse in gratia illis tribus mensibus ex præsentia Virginis; et cap. sequent. dicit: *Tempus siletur in infantia, quia presentia Domini matris in utero roboretur, qui infantia impedimenta nescivit;* et infra, cap. de Prophetia Zacharie, ait, *Zacharium ideo locutum esse ad filium: Et tu, puer, etc., quia eum audire poterat, qui salutationem Mariæ audierat.* Quæ omnia sumpsit ex Origene, homilia 8 et 9 in Lucam. Secundo confirmari hoc potest ex fide digna historia, qua fertur B. Virginem tertio suæ ætatis anno intelligentem quidem, ac consentientem fuisse in templum a parentibus oblatam. Ita tradit Greg. Nyss., oratione de Christ. Nativit.; et Damascen., lib. 4 Fidei, c. 15; Evodius et alii, quos infra referam. Verum est tamen non omnes Patres diserte affirmare B. Virginem eo tempore rationis usum habuisse, satis tamen indicant, et expressius habetur in illa historia, quæ nomini Hieronymi circumfertur; et Antonin., 1 p. Historiali, titul. 4, cap. 6, § 10, dicit, *nihil illi tunc defuisse ad perfectam ætatem, et jam tunc ascensisse mente ad quindecim gradus perfectionis, in quindecim Psalmis cantici graduum significatos,* et idem sentit Dionysius Carthus., in 1 p. Vitæ Christi, § 2; ergo fuit acceleratus usus rationis Virgini in ea ætate; ordinaria enim lege naturæ, non poterat tunc ratione uti. Quod usitato exemplo Joannis Baptistæ confirmare possumus. Ille enim (sicut virum decebat) a tenera ætate, quando juxta naturæ leges nondum ratiocinari poterat, ab Spiritu Sancto inspiratus et illuminatus, in eremum abiit, ut divinæ contemplationi vacaret, ut Chrysostomus indicat, homil. 38 in Matth.; et Origenes, homil. 9 in Lucam; et clarius Nicephorus, lib. 1 Histor., c. 14. Sic ergo B. Virgo (sicut decebat virginem) templum adiit, ubi continua fere Dei contemplatione frui posset. Ergo verisimile est hunc rationis usum, quem saepius in infantia Virginem habuisse conspicimus, constantem ac perpetuum in ea fuisse. Tertio accedit, quod Dei opera perfecta sunt, ejusque dona sine pœnitentia, neque auferuntur sine culpa, præsertim quando dantur in utilitatem et perfectiorem sanctificationem suscipientium; unde fit ut sit etiam hæc major perfectio Virginis,

SECTIO VIII.
Utrum B. Virgo sanctificata fuerit per propriam dispositionem.

1. Virgo per propriam dispositionem primo sanctificata. — Hæc quæstio ex praecedenti

definita est. Dicendum est enim B. Virginem fuisse sanctificatam per propriam dispositionem. Ita docet S. Bernardinus, loco supra citato. Et probatur ex dictis. Primo, quia in illo instanti B. Virgo habuit cognitionem Dei; non est autem verisimile habuisse illam otiosam et quasi emortuam. Habuit ergo simul actum liberi arbitrii in Deum, quo illum super omnia dilexit; nam in hunc potissimum finem data est ei hæc cognitio; et omnes conjecturæ, quibus ad cognitionem probandam usi sumus, efficacius de spe et amore procedunt; ergo. Secundo, quia sanctificari per proprium actum est perfectior modus (ut D. Thom. infra probat, q. 34, art. 3). Ergo credendum est hoc modo fuisse sanctificatam Virginem. Et confirmatur, quia nullus sanctificatur sine proprio libero consensu, nisi veluti per accidentem, propter impotentiam utendi ratione; ratio enim perfecta ac propria ineundi amictiam divinam, et veluti spiritualem desponsationem quæ in prima sanctificatione fit, utriusque partis consensum requirit; sed in Virgine non erat hæc impotentia, nam (ut ostensum est) ratione uti poterat; ergo. Tertio, quia propter has rationes tam Angeli quam Adam sanctificati fuerunt per propriam dispositionem; et idem dicendum est de Joanne Baptista, nam gaudium illud, quo exultavit, signum amoris fuit; multo ergo magis asserendum hoc erit de Virgine Beata.

2. Objectio. — Responsio. — Qualis dispositio fuerit in Virgine ad gratiam in sua Conceptione. — Dices: ergo non est operata B. Virgo in illo instanti per habitus gratiae et charitatis; dispositio enim ad infusionem gratiae et donorum non procedit ab habitibus (ut suppono); consequens autem non videtur verum, quia ille est imperfectus modus operandi. Respondetur: duplice intelligi potest hæc sanctificatio per propriam dispositionem: uno modo, ut sit hæc dispositio preparans subjectum ad receptionem habitus, et tunc verum est talem dispositionem non effici ab habitu, nam potius habitus infunditur, quia dispositio effecta est, non ut efficiatur; alio modo potest hæc dispositio intelligi, non ut preparans, sed ut perficiens, et ut sanctificationem consummans; et quando dispositio talis est, ab habitu seu principio intrinseco procedit. Potest ergo dici, Beatam Virginem fuisse sanctificatam per propriam dispositionem hoc posteriori modo, et ita facile expeditur difficultas posita. Mihi tamen verisimilius est fuisse priori

modo sanctificatam. Ille enim est magis accommodatus viatoribus ratione utentibus, et omnibus pensatis ad majorem perfectionem pertinet; nam qui se ad gratiam disponit, quodammodo se sanctificat, et cum divino auxilio est sibi aliquo modo causa gratiae, quod majoris perfectionis est quam ex habitu primum actum elicere, vel solum ex auxilio. 3. In prima sanctificatione Virgo meruit de condigno gloriam. — Ex hac doctrina inferatur, meruisse Virginem in prima sanctificatione sua de condigno, non gratiam, sed gloriam. Hoc constat ex generali principio quod in materia de gratia traditur, nimurum, ultimam dispositionem ad gratiam esse meritoriam, quod cum ad perfectionem spectet, etiam in Virgine locum habet; imo etiam Christum Dominum in primo instanti Conceptionis meruisse, simili arguento probat D. Thomas infra, q. 34, a. 3. Certum est autem non potuisse B. Virginem per eam dispositionem gratiam mereri, quia principium meriti non cadit sub merito; gloriam autem mereri potuit, quia illa caruit; qua privatione supposita, majoris perfectionis est obtinere illam ex merito, quam sine illo. Et confirmatur argumento sæpe facto, quia Angeli et Adam meruerunt primam gloriam per eum actum, quo se ad gratiam disposuerunt; et idem de Joanne Baptista credibile est, de quo Sancti aint, *suo merito patri loquela restituisse*, ut Greg. Naz., orat. 12, quæ est prima de Pace; et Ambr., serm. 64, et super Lue., ubi Beda, et alii. Et Ecclesia canit: *Hinc parens nati meritis, uterque abdita pandit;* ergo multo magis credendum est, Virginem meruisse gloriam a prima sua sanctificatione. De qua hæc dicta sufficient. Nam de merito Virginis et augmentatione gratiae, aliisque donis et gratiis illi collatis, infra commodiori loco disputabimus.

QUÆSTIO XXVIII.

DE VIRGINITATE B. MARIE, IN QUATUOR ARTICULOS DIVISA.

Deinde considerandum est de Virginitate matris Dei.

Et circa hoc queruntur quatuor.

Primo, utrum fuerit Virgo in concipiendo.

Secundo, utrum fuerit Virgo in partu.

Tertio, utrum permanserit Virgo post partum.

Quarto, utrum votum virginitatis emiserit